

# JPS Pahang diminta atasi banjir



Fauzi (tengah) dan Chean Chung (kiri) menyampaikan memorandum penduduk kepada wakil JPS Pahang di pejabat jabatan itu di sini semalam.

KUANTAN - Jabatan Pengairan dan Saliran (JPS) Pahang dituntut mencari untuk mendapatkan langkah penyelesaian segera bagi mengatasi masalah banjir yang melanda Taman Bukit Setongkol Maju dan Kampung Cenderawasih sejak beberapa tahun lalu.

Adun Semambu, Lee Chean Chung berkata, masalah tersebut berlaku setiap kali musim tengkujuh dan terbaru pada tiga minggu lalu menyebabkan pelbagai kesulitan yang terpaksa dihadapi penduduk di dua buah kawasan tersebut.

Menurutnya, sebelum ini pada tiga tahun lalu situasi terbabit disuarakan kepada jabatan terbabit yang telah melawat dan dialog bersama penduduk namun masalah sama tetap berulang.

“Sebab itu kita sampaikan lagi hasrat penduduk dengan penyerahan memorandum yang mengandungi tandatangan 100

penduduk daripada Bukit Setongkol Maju supaya satu tindakan khusus dapat diambil oleh JPS Pahang.

“Manakala dari Kampung Cenderawasih, ia dalam proses untuk mendapatkan tandatangan mereka,” katanya kepada *Sinar Harian*.

Beliau bersama Pengerusi PKR, Datuk Fauzi Abdul Rahman ditemui media selepas penyerahan memorandum kepada JPS Pahang di Bangunan Kompleks Tun Abdul Razak (Komtur) Indera Mahkota di sini semalam.

Chean Chung turut menambah, pihaknya bersedia menganjurkan sesi dialog bersama jabatan itu sekiranya situasi memerlukan.

Sementara itu Fauzi memberitahu, pihaknya mengharapkan jabatan terlibat dapat mengambil satu tindakan konkrit demi kesejahteraan penduduk yang terlibat.